

थिस्सलुनीकियन क दूसरी पत्र

1 पौलुस, सिलवानुस अउर तीमुथियुस क ओर स हमरे परमपिता परमेस्सर अउर पभू ईसू मसीह में स्थित थिस्सलुनीकियन क कलीसिया क नाउँ,

2 तू सबन क पिता परमेस्सर अउर ईसू मसीह कइँती स अनुग्रह अउर सान्ति मिलइ।

3 भाइयो तथा बहिनियो, तू पचन क बरे हमका हमेसा परमेस्सर क धन्यवाद करइ चाही: अइसेन करब उचित बा। काहेकि तू पचन क बिसवासे क अचरज भरा रूप स विकास होत बा अउर तोहमाँ आपस इ मैं पिरेम बढत बा। 4 इही बरे परमेस्सर क कलीसियन मैं हम खुद तू सबन प गरब करित अही। तू पचन क यातना क बीच अउर कस्टन क सहत धैर्यपूर्वक सहन करई तू सबन क बिसवासे क परगट करत ह।

परमेस्सर क निआव क चर्चा

5 इ एह बाते क स्पस्ट प्रमाण बा कि परमेस्सर क निआव सच्चा बा। ओकर उद्देस इहई बा कि तू पचे परमेस्सर क राज्य मैं प्रवेस करइ योग्य ठहरा। तू सबइ अब उही क बरे तउ कस्ट उठावत अहा। 6 निस्चय ही परमेस्सर क डिस्टी मैं इ निआव ठीक बा कि तोहे सबन क जउन दुखन देत अहई, ओनका बदले मैं दुख हीं दीन्ह जाइ।

7 अउर तू जउन कस्ट सहत अहा, ओनका हमरे साथे ओह समइ आराम दीन्ह जाई जब पभू ईसू अपने समरथ दूतन क साथे सरग स 8 धधकत आगी मैं परगट होई। अउर जउन परमेस्सर क नाहीं जनतेन अउर हमरे पभू ईसू मसीह क सुसमाचार पर नाहीं चलतेन, ओनका दण्ड दीन्ह जाई। 9 ओन्हे अनंत बिनास क दण्ड दीन्ह जाई। ओन्हे पभू अउर ओनकर महिमा भरी सक्ति क सामने स हटाइ दीन्ह जाई।

10 उ अपने पवित्तर लोगन क साथ महिमा प्राप्त करइ आई, अउर अपने आश्चर्यचकित करइ क अभिव्यक्ति करी ओनके बीच जो उन पर बिसवास करत हीं। 11 इही बरे हम तोहरे बरे परमेस्सर स हमेसा पराथना करित ह कि हमार परमेस्सर तोहे ओह जीवन क योग्य समझई जेका जिअइ क बरे तोहे सबन क बोलावा गवा बा। अउर उ तोहार सब सुभ इच्छा क प्रबल रूप स पूरा करइ अउर सब ओह कामे क उ सफल बनावइ जउन तोहरे बिसवासे क प्रमाण अहइ। 12 इही तरह हमार पभू ईसू मसीह क नाउँ तोहरे द्वारा आदर पइहीं। तू पचे ओकरे द्वारा आदर पउब्या। इ सब कछू हमरे परमेस्सर क अउर पभू ईसू क अनुग्रह स होइ।

पभू क अवाई स पहिले दुर्घटना घटिहीं

2 भाइयो तथा बहिनियो, अब हम अपने पभू ईसू मसीह क फिन स अवाई अउर ओकरे साथे आपस मैं एकट्ठा होइ क बारे मैं निवेदन करत अही कि तू अचानक अपने विवेक क कउनो भविस्सबाणी कउनो उपदेस अउर कउनो अइसेन चिट्ठ स न खोवा जेकाँ हमरे द्वारा लिखा गवा समझा जात होइ अउर तथाकथित रूप स जेहमाँ बतावा गवा होइ कि पभू क दिन आई चुका अहइ, तू अपने मने मैं डावोंडोल जिन हवा। 3 तू पचे अपने आपके कउनो क द्वारा कउनउ प्रकार छला न जाइ सका। मई अइसेन एह बरे कहत हई काहेकि उ दिन ओह समइ तक न आई जब तक कि परमेस्सर स मुँह मोड़ लेइ क समइ नहीं आई जात, अउर दुस्ट मनइ परगट नाहीं होइ जात। ओह दुस्ट-मनइ क नियति तउ नरक बा।

4 उ अपने क सब चीज स उप्पर कही अउर ओनकर विरोध करी अइसेन चीजन का परमेस्सर का कही जात हीं अउर जउन पूजनीय बा। इहाँ तक कि परमेस्सर क मंदिर मैं जाइ क सिंहासन पर बइठिके इ दावा करी कि उहइ परमेस्सर बा।

5 का तोहे याद नाहीं बा कि जब मई तोहरे साथे रहे तउ तोहे इ सब बतावा गवा रहा 6 अउर तू तउ अबइ जनतइ अहा कि ओका का अबहीं परगट होइ स रोके अहइ, ताकि उ ऊचित अवसर आए पर ही परगट होइ। 7 मई अइसेन एह बरे कहत हई काहेकि दुस्ट मनइ क रहस्य भरी सक्ती जउन बे व्यवस्था क अहइ अबहुँ आपन काम करत बा। अब केउ ऐका रोक रहा बा अउर उ तब तक ऐका रोकत रही, जब तलक, ओका रोके रखइबाले क रस्ता स हटाई न दीन्ह जाइ। 8 तबइ उ दुस्ट मनइ परगट होइ जब पभू ईसू आपन महिमा मैं फिन परगट होई तब ओका पभू ईसू अपने मुँह क फूँक स मार डाईगा अउर अपने उपस्थिति क तेज स ओका भस्म कर देई। 9 ओह दुस्ट मनइ सइतान क सक्ती स परगट होइ अउर उ बहुत बड़ी सक्ती, झूठे चमत्कारन, अद्भुत चिन्हन अउर अचरजे कारजन,

10 अउर सब परकार क पाप स भरा छल-परपंच स भरा होइ। उ एनकर उपयोग मनइय क विरुद्ध करी जउन सर्वनासे क रस्ता मैं खोवा हवा अहई। उ भटक गवा हयेन काहेकि ओन्हन सत्य स पिरेम नाहीं किहे बाटेन, कहुँ ओनकर उद्धार न होइ जाइ। 11 इही बरे परमेस्सर ओहमन एक छली सक्ती क काम मैं कई देई जेहसे उ झूठ मैं बिसवास करइ लाग रहेन। एहसे ओनकर बिसवास जउन झूठ बा, ओह पर होई। 12 एहसे उ सभन जे सत्य पर

बिसवास नाही किहेन अउर झूठ में आनन्द लेत रहेन, दण्ड पइहीं।

तोहे छुटकारा क बरे चुना गवा बा

13भाइयो तथा बहिनियो, पभू तोहका पियार करत ह। तोहरे पचन क बरे हमका हमेसा परमेस्सर क धन्यवाद करइ चाही काहेकि परमेस्सर तउ आतिमा क द्वारा तोहे सबन क पक्वितर कइक अउर सत्य में तोहरे बिसवास क कारण उद्धार पावइ क बरे तोहे सबन क चुने अहइ। जेन्हन मनइयन क उद्धार होइ क बा, तू ओह सबन क पहिली फसल क एक हीसा अहा। 14अउर इही उद्धार क बरे जेका सुसमाचार क हम तोहे सबन क उपदेस दिहे हई ओकरे द्वारा परमेस्सर तउ तोहे पचन क बोलाएस ताकि तू पचे हमार पभू ईसू मसीह क महिमा क धारण कइ सका। 15इही बरे भाइयो तथा बहिनियो, अटल बना रहा अउर जउन उपदेस तोहे मौखिक रूप स या हमरे चिटिठयन क द्वारा दीन्ह गवा रहा, ओका थामे रखा।

16-17अब हमार पभू खुद ईसू मसीह अउर हमार परमपिता परमेस्सर जे हम पइ आपन पिरेम दर्साए अहइ अउर हमका परम प्रोत्साहन प्रदान किहे अहइ अउर जे हमका अपने अनुग्रह में मजबूत आसा प्रदान किहे अहइ तोहरे सबन क हिरदइ क आनन्द देइ अउर सब अच्छी बातन में जेका तू कहत ह या करत ह, तोहे प्रोत्साहित बनावइ।

हमरे बरे पराथना करा

3भाइयो तथा बहिनियो, तोहे पचन क कछू अउर बात हमका बतावइ क बाटइ। हमरे करे पराथना करा कि पभू क उपदेस तेजी स फइलइ अउर महिमा पावई। जइसेन कि तोहे लोगन क बीच में भवा बा। 2पराथना करा कि हम बुरे अउर दुस्ट मनइयन स दूर रही। (काहेकि सभन जने क तउ पभू में बिसवास नाही होत ह।)

3मुला पभू तउ बिसवास स भरा अहइ। उ तोहार सक्ती बढ़ाई अउर तोहे सबन क ओह दुस्ट स बचाइ रखी। 4हमका पभू में तोहार स्थिति क बारे में दृढ़ बिसवास बा। अउर हमका पूरा निश्चय बा कि हम तोहे जउन कछू करइ क कहे हई, तू वइसेन ही कइ चुका रह्या अउर करत रहब्या। 5पभू तोहरे पचन क हिरदइ क परमेस्सर क पिरेम अउर मसीह क धैर्य भरा मजबूती कइँती आगे करइ।

करम क अनिवार्यता

6भाइयो तथा बहिनियो, अब तोहे सबन क हमार पभू ईसू मसीह क नाउँ में इ हुकुम बा कि तू हर ओह भाइयन स दूर रहा जउन अइसेन जीवन जिअत ह जउन अनुचित चाल चलत अहइ। 7मई इ एँह बरे कहत हउँ काहेकि तू तउ खुदइ इ जानत बाट्या कि तोहे पचन क हमार अनुकरण कइसे करइ चाही काहेकि तोहरे बीच रहत भए हम कभउँ आलसी नाही रहे। 8हम बिना मूल चुकाए कीहीउँ स भोजन नाही ग्रहण कीन्ह, बल्कि जतन अउर मेहनत करत भए हम दिन रात काम में जुटा रहे ताकि तोहमाँ स कीहीउँ पर बोझ न पड़इ। 9अइसा नाही अहइ कि हमका तोहसे सहायता लेइ क कउनउ अधिकार नाही बाटइ, बल्कि हम एह बरे कड़ी मेहनत करत अही ताकि तू ओकर अनुसरण कइ सका। 10इही बरे हम जब तोहरे साथे रहे, हम तोहे पचन क इ हुकुम दिहे रहे, “अगर केउ काम न करइ चाहइ तउ उ खाना भी न खाइ।”

11हमका अइसा बतावा गवा ह कि तोहरे बीच कछू अइसेन भी बाटेन जउन अइसेन जीवन जिअत हीं जउन ओनके अनुकूल नाही अहइ। उ कउनउ काम नाही करतेन, दुसरेन क बातन में टॉंग अड़ावत हीं एहर-ओहर घूमत फिरत हीं। 12अइसेन लोगन क हम पभू ईसू मसीह क नाउँ प समझावत हुकुम देत अही कि उ सान्ति क साथे आपन काम करइ अउर अपने कमाई क ही खाना खाईं। 13मुला भाइयो अउ बहिनियो! जहाँ तक तोहार बात बा, भलाई करत कभउँ न थका।

14इ चिट्ठी क माध्यम स दीन्ह गए हमरे हुकुमन पर अगर केउ न चलइ त ओह मनई पर नजर रखा कि उ कउन बाटइ अउर ओनकर संगत स दूर रहा ताकि ओका सरम आवइ। 15मुला ओनके साथे सत्रुअन जइसा व्यवहार न करा बल्कि भाई क समान ओका चेतावा।

चिट्ठी समापन

16अब सान्ति क पभू खुद तोहे सब समइ, सब तरह स सान्ति देइ। पभू तू सबके साथे रहा।

17मई पौलुस खुद आपन लिखाई में इ नमस्कार लिखत हउँ। मई एह तरह सब चिट्ठी पर दसखत करत हउँ। मोरी लिखाई क सैली इहइ अहइ। 18हमार पभू ईसू मसीह क अनुग्रह तोहे सभन पर बना रहइ।